

Rancangan Malaysia Kesebelas: Pertumbuhan berpaksikan rakyat

**Pertumbuhan
berpaksikan rakyat**

Mengimbas pencapaian

Lima tahun akan datang

Cabaran dan peluang

**Perspektif ekonomi
makro**

**Enam teras strategik dan
enam pemacu perubahan**

**Mentransformasi
perkhidmatan awam
untuk produktiviti**

Malaysia pasca 2020

Kesimpulan



Pertumbuhan berpaksikan rakyat

Rancangan Malaysia Kesebelas (RMKe-11), 2016-2020 merupakan rancangan pembangunan lima tahun terakhir ke arah merealisasikan matlamat Wawasan 2020. Wawasan 2020 yang dilancarkan pada tahun 1991 menggariskan aspirasi Malaysia untuk menjadi negara maju dalam semua aspek, iaitu ekonomi, politik, sosial, kerohanian, psikologi dan budaya menjelang tahun 2020. Susulan daripada pencapaian pembangunan yang cemerlang dalam tempoh separuh dekad yang lalu, RMKe-11 mengukuhkan lagi komitmen Kerajaan untuk mencapai pertumbuhan yang bermatlamatkan kemakmuran dan kesejahteraan rakyat. RMKe-11 berteraskan prinsip “Bangsa Malaysia” yang progresif dan bersatu serta berkongsi cita-cita dan komitmen yang sama dalam meningkatkan lagi kemakmuran negara untuk rakyat.

Penyediaan RMKe-11 adalah berpandukan Strategi Pembangunan Nasional Malaysia (MyNDS) yang memberikan tumpuan kepada pembangunan ekonomi berteraskan rakyat dan ekonomi berasaskan modal dengan pelaksanaan program dan projek yang berimpak tinggi, boleh dilaksanakan dengan pantas serta kos yang rendah kepada Kerajaan. Ekonomi berasaskan modal merujuk kepada pertumbuhan Keluaran Dalam Negeri Kasar (KDNK), perniagaan besar, projek pelaburan besar dan pasaran kewangan, manakala ekonomi berteraskan rakyat lebih menumpukan kepada kepentingan rakyat, termasuk peluang pekerjaan, perniagaan kecil, kos sara hidup, kesejahteraan keluarga, dan penyertaan masyarakat.

Sehubungan ini, RMKe-11 merupakan satu pelan strategik yang melakar perjalanan pembangunan masa hadapan Malaysia yang selaras dengan impian rakyat dan dapat menikmati hasil pembangunan yang sepatutnya. Pelan yang bertemakan “pertumbuhan berpaksikan rakyat” ini merupakan satu pelan strategik yang menggariskan komitmen Kerajaan untuk memenuhi aspirasi rakyat. RMKe-11 mengandungi enam teras strategik dan enam pemacu perubahan yang akan melaksanakan usaha untuk merealisasikan matlamat Malaysia menjadi negara maju dan inklusif selaras dengan Wawasan 2020.

Mengimbas Pencapaian

ANTARA
NEGARA YANG
TERBAIK

KDNK
benar
6.2%
setahun

Dalam tempoh lima dekad yang lalu, Malaysia berjaya menjadi antara negara yang terbaik di Asia dalam pencapaian pertumbuhan ekonomi walaupun menghadapi pelbagai cabaran dan kejutan ekonomi. Pertumbuhan KDNK benar adalah stabil pada kadar 6.2% setahun sejak tahun 1970. Malaysia berjaya mentransformasi struktur ekonomi daripada ekonomi berasaskan pertanian dalam dekad 1970-an kepada ekonomi berasaskan pembuatan pada pertengahan dekad 1980-an dan kepada perkhidmatan moden dalam dekad 1990-an. Malaysia membangun daripada ekonomi berpendapatan rendah dalam dekad 1970-an kepada ekonomi berpendapatan sederhana tinggi mulai tahun 1992 dan kekal sehingga kini.

25X

peningkatan
pendapatan per
kapita




Pendapatan per kapita nasional meningkat lebih 25 kali daripada AS\$402 pada tahun 1970 kepada AS\$10,796 pada tahun 2014.

Pencapaian ini menunjukkan Malaysia berada pada landasan yang betul untuk melepasi paras pendapatan minimum ekonomi berpendapatan tinggi, iaitu AS\$15,000 menjelang tahun 2020.

MALAYSIA





Kadar kemiskinan telah berkurang daripada 49.3% pada tahun 1970 kepada 0.6% pada tahun 2014 manakala kemiskinan tegar telah berjaya dibasmi.

Pendapatan bulanan isi rumah



Pendapatan bulanan purata isi rumah meningkat lebih 20 kali daripada RM264 pada tahun 1970 kepada RM6,141 pada tahun 2014. Dalam tempoh yang sama, pendapatan penengah meningkat daripada RM166 kepada RM4,585. Jurang pendapatan juga semakin mengecil seperti yang ditunjukkan oleh pekali Gini daripada 0.513 pada tahun 1970 kepada 0.401 pada tahun 2014.



Rakyat Malaysia juga mempunyai jangka hayat yang lebih panjang. Kadar jangka hayat meningkat kepada 75 tahun, iaitu peningkatan lebih daripada 10 tahun. Tahap pendidikan rakyat Malaysia juga bertambah baik. Sebanyak 27% daripada tenaga buruh mempunyai pendidikan tertiar, iaitu meningkat empat kali berbanding pada tahun 1980. Mobiliti rakyat telah meningkat dengan ketara berikutan ketersambungan yang lebih baik melalui perluasan rangkaian jalan raya, rel dan udara.




ke-12

Malaysia boleh berbangga kerana menjadi negara ke-12 paling berdaya saing daripada 60 negara dalam *World Competitiveness Yearbook 2014*, *International Institute for Management Development*.

ke-20

kedudukan ke-20 daripada 144 negara dalam *Global Competitiveness Report 2014-2015*, *World Economic Forum*; dan ke-18 daripada 189 negara dalam *Doing Business Report 2015*, *World Bank*.



Semua lapisan rakyat tanpa mengira etnik dan lokasi menikmati kualiti hidup yang lebih baik. Pada tahun 2014, sebanyak 76.1% daripada isi rumah dan 75.3% daripada isi rumah miskin memiliki kediaman sendiri.

95.1%

daripada penduduk mendapat akses kepada air yang boleh diminum


97.6%

mendapat bekalan elektrik



20
TERATAS

Berdasarkan *Economist Intelligence Unit's 2014 Business Environment Rankings*, Malaysia merupakan negara 20 teratas sebagai destinasi yang mesra pelabur.



Kejayaan ini dicapai hasil daripada falsafah pembangunan Malaysia yang menjadikan kemakmuran dan kesejahteraan rakyat sebagai matlamat utama pertumbuhan ekonomi. Komitmen ini dapat dilihat dalam pelaksanaan dasar pembangunan seperti yang berikut:

Dasar Ekonomi Baru

1971-1990

Dasar Ekonomi Baru, 1971-1990 memberikan tumpuan kepada pembasmian kemiskinan tanpa mengira etnik dan penghapusan pengenalan etnik mengikut fungsi ekonomi.

Dasar Pembangunan Nasional

1991-2000

Dasar Pembangunan Nasional, 1991-2000 memberikan tumpuan kepada pencapaian pembangunan yang seimbang antara sektor utama ekonomi dan wilayah serta mengurangkan jurang sosioekonomi antara masyarakat.

Dasar Wawasan Negara

2001-2010

Dasar Wawasan Negara, 2001-2010 menumpukan kepada pembinaan keutuhan dan daya saing negara.

Dasar Transformasi Negara

2011-2020

Dasar Transformasi Negara, 2011-2020, mengekalkan tumpuan berpaksikan rakyat melalui Model Baru Ekonomi. Model ini menetapkan matlamat untuk menjadi ekonomi berpendapatan tinggi yang inklusif serta mampan.

Agenda transformasi ini disokong oleh Program Transformasi Ekonomi yang menumpukan kepada 12 bidang ekonomi yang sangat penting untuk pertumbuhan negara secara berterusan. Program Transformasi Kerajaan pula memberikan penekanan kepada bidang yang menjadi keutamaan rakyat. Kerajaan juga telah memperkenalkan MyNDS bagi memperkukuh pelaksanaan pembangunan.



Lima tahun akan datang

RMKe-11 dirangka dengan memberikan keutamaan kepada rakyat dalam semua usaha pembangunan. Ekonomi berteraskan rakyat akan diberikan keutamaan. Pendekatan ini mengukuhkan komitmen Kerajaan untuk meningkatkan taraf hidup, martabat dan potensi rakyat untuk memanfaatkan pembangunan dan kemajuan ekonomi. Selaras dengan matlamat mencapai status negara maju dan inklusif menjelang tahun 2020, semua lapisan masyarakat perlu mendapat faedah daripada kemakmuran ekonomi negara. Sehubungan itu, buat pertama kali sasaran pertumbuhan negara bukan sahaja akan diukur berdasarkan pertumbuhan KDNK dan pendapatan per kapita, tetapi juga mengambil kira pendapatan isi rumah dan Indeks Kesejahteraan Rakyat Malaysia. Usaha ini bertujuan untuk menilai impak pertumbuhan ekonomi terhadap kesejahteraan rakyat.


Purata pendapatan nasional

Malaysia berhasrat mencapai status negara maju menjelang tahun 2020 dengan pendapatan per kapita nasional

MELEBIHI

AS\$15,000

Walaupun tidak semua rakyat akan memperoleh tahap pendapatan per kapita sebanyak AS\$15,000, semua lapisan masyarakat dijangka memperoleh peningkatan pendapatan dan tahap kesejahteraan tanpa mengira lokasi, etnik dan kategori pendapatan.



Cabaran dan peluang

Dalam tempoh RMKe-11, pembangunan ekonomi dijangka lebih mencabar berikutan ketidakpastian ekonomi global yang berterusan. Ketidakpastian ini terutamanya disebabkan oleh jangkakan harga minyak mentah dan komoditi utama lain yang rendah, dan risiko kelembapan ekonomi negara rakan dagang utama. Pada peringkat domestik, usaha yang lebih bersepadu perlu diambil untuk melonjakkan produktiviti bagi memacu pertumbuhan ekonomi, mengukuhkan kedudukan fiskal di samping memastikan peruntukan Kerajaan yang mencukupi untuk terus menyokong perkembangan ekonomi. Usaha juga akan diambil untuk meningkatkan pendapatan purata dan peratusan pendapatan kumpulan isi rumah berpendapatan 40% terendah (B40) bagi mencapai matlamat inklusif sepenuhnya.

Dalam tempoh RMKe-11, peluang baharu untuk melonjakkan pertumbuhan perdagangan dan pelaburan akan terbuka terutamanya dengan penubuhan Komuniti Ekonomi ASEAN (AEC) yang menjadi pasaran tunggal yang mempunyai lebih daripada 600 juta pengguna. Pada peringkat domestik, Malaysia mempunyai penduduk berumur muda yang semakin meningkat, dengan umur penengah lebih kurang 30 tahun serta penduduk dalam kumpulan bekerja yang merupakan 70% daripada jumlah penduduk. Kelebihan demografi ini akan menjadi penyumbang kepada pemelesaian pertumbuhan ekonomi. Masyarakat Malaysia yang berbilang etnik dan pelbagai budaya merupakan satu lagi aset unik. Walau bagaimanapun, kelebihan aset ini masih belum dimanfaatkan sepenuhnya dari segi hubungan yang telah lama terjalin dengan negara Islam, Republik Rakyat China dan India serta sebagai aset tarikan pelancongan.

Perspektif ekonomi makro

Dalam tempoh RMKe-11, KDNK benar dianggarkan berkembang antara 5%-6% setahun. Pendapatan Negara Kasar (PNK) per kapita dijangka mencapai AS\$15,690 (RM54,100), iaitu melebihi paras pendapatan minimum AS\$15,000 bagi ekonomi berpendapatan tinggi. Dalam tempoh RMKe-11, sejumlah 1.5 juta peluang pekerjaan dijangka diwujudkan. Produktiviti buruh dijangka meningkat melalui peralihan yang berterusan daripada aktiviti ekonomi berintensif buruh kepada berintensif pengetahuan dan inovasi. Pertumbuhan ekonomi akan dipacu oleh sektor swasta dengan pelaburan swasta berkembang sebanyak 9.4% setahun. Semua sektor ekonomi akan mencatat pertumbuhan yang kukuh dengan sektor pembuatan dan perkhidmatan menyumbang lebih daripada 75% kepada KDNK. Sektor luar juga dijangka menjadi penyumbang positif kepada pertumbuhan berikutan pemulihan dalam eksport. Akaun semasa imbalan pembayaran dijangka kekal mencatat lebihan sebanyak 2.6% kepada PNK. Kedudukan fiskal Kerajaan

Persekutuan dijangka terus kukuh dan mencapai bajet berimbang pada tahun 2020. Inflasi dijangka kekal rendah di bawah 3% dan ekonomi dijangka kekal pada tahap guna tenaga penuh.

Asas ekonomi makro akan diperkukuh untuk mencapai pertumbuhan mampan dengan memastikan harga dan kadar tukaran asing yang stabil, dan tahap simpanan yang mencukupi sebagai sumber pelaburan. Kerajaan juga akan menggalakkan penggunaan swasta, dan pelaburan swasta dalam sektor pertanian, pembuatan dan perkhidmatan bagi menerajui pertumbuhan ekonomi dan meningkatkan eksport dengan menambah baik daya saing produk, menggalakkan eksport perkhidmatan dan mempelbagaikan pasaran. Pengurusan fiskal yang lebih berhemat akan diperkenalkan untuk meningkatkan fleksibiliti fiskal, dan langkah bagi meningkatkan potensi produktiviti akan dilaksanakan bagi memastikan pembangunan yang inklusif dan mampan.

RMKe-11 menggunakan kaedah dan rangka kerja Strategi Lautan Biru (BOS) sebagai sebahagian daripada Strategi Lautan Biru Kebangsaan (NBOS), untuk merangka dan mempercepat pelaksanaan strategi nasional yang berimpak tinggi dan berkost rendah. BOS dapat mewujudkan pasaran tanpa persaingan melalui pembezaan produk dan perkhidmatan dengan kos yang rendah. Dalam konteks perniagaan, ini bermaksud menyediakan produk dan perkhidmatan yang dapat memberikan nilai kepuasan yang tinggi kepada pelanggan pada kos yang rendah. Bagi Kerajaan pula, ini bermakna menyampaikan perkhidmatan dan melaksanakan pembangunan yang memberikan impak tinggi kepada rakyat dengan pantas pada kos yang rendah. Satu daripada kaedah utama BOS yang digunakan dalam penyediaan RMKe-11 adalah kanvas strategi, iaitu rangka kerja dan tindakan diagnostik untuk memberikan gambaran strategi. Kanvas strategi menggambarkan keadaan sedia ada dan membandingkannya dengan hala tuju strategik baharu yang akan dilaksanakan oleh Kerajaan dalam tempoh RMKe-11.

Enam teras strategik dan enam pemacu perubahan

Melangkah ke hadapan, RMKe-11 menjadi platform penting dalam usaha Kerajaan melaksanakan anjakan dasar pembangunan dan merangka pendekatan baharu bagi menangani pelbagai cabaran baharu dan sedia ada. Pembangunan sosioekonomi tidak lagi boleh dilaksanakan sebagaimana kelaziman (*business as usual*), sekiranya Malaysia ingin mencapai status negara maju dan inklusif dalam tempoh lima tahun akan datang.

Teras strategik

Kerajaan telah menggariskan enam teras strategik bagi membantu Malaysia sentiasa bersedia menghadapi cabaran dan memanfaatkan peluang berikutan perubahan landskap global dan politik yang pantas. Teras strategik ini bertujuan memenuhi pelbagai keperluan rakyat dan negara secara menyeluruh.

Pemacu perubahan

Kerajaan telah mengenal pasti enam pemacu perubahan yang merupakan pendekatan yang inovatif bagi mempercepat pembangunan Malaysia. Kejayaan pelaksanaan pemacu perubahan akan mengubah trajektori pertumbuhan ekonomi negara dengan ketara.

Empat daripada pemacu perubahan ini adalah kritikal untuk menjadi negara maju. Pemacu perubahan ini bertujuan meningkatkan produktiviti bagi mempercepat pertumbuhan sektoral; mempergiat inovasi bagi menjana sumber hasil baharu; memperkukuh pendidikan dan latihan teknikal dan vokasional (TVET) bagi menyediakan tenaga kerja berkemahiran tinggi; dan membangunkan bandar sebagai sumber daya saing. Kerajaan akan meningkatkan pendapatan dan kesejahteraan isi rumah B40 untuk memastikan semua rakyat dapat terlibat dalam aktiviti ekonomi dan mendapat manfaat daripada pertumbuhan ekonomi. Kerajaan juga akan memberikan tumpuan kepada pertumbuhan hijau melalui anjakan paradigma pertumbuhan mampan yang kini hanya memberikan fokus kepada kekayaan semula jadi kepada pertumbuhan yang mengambil kira amalan penggunaan dan pengeluaran mampan dalam semua sektor ekonomi dan isi rumah.



Enam teras strategik



**Memperkukuh
inklusi
ke arah
masyarakat
yang saksama**

Inklusiviti sentiasa menjadi prinsip penting agenda pembangunan sosioekonomi negara dan matlamat utama Model Baru Ekonomi. Komitmen ini membolehkan hasil pembangunan dikongsi bersama dalam kalangan rakyat tanpa mengira gender, etnik, tahap sosioekonomi dan lokasi. Komitmen ini adalah berdasarkan keyakinan bahawa pembangunan inklusif bukan sahaja untuk meningkatkan kesejahteraan individu dan masyarakat, tetapi juga untuk mengekalkan pertumbuhan ekonomi yang kukuh bagi tempoh yang lebih panjang.

Sehubungan ini, Kerajaan komited untuk memastikan peluang yang saksama diperoleh oleh semua segmen masyarakat, terutamanya isi rumah B40. Rakyat terutamanya kumpulan mudah terjejas ini akan mendapat akses yang lebih baik kepada pendidikan dan latihan yang berkualiti, infrastruktur dan kemudahan asas yang cekap, pekerjaan yang lebih baik dan peluang keusahawanan serta pemilikan kekayaan. Kawasan luar bandar akan ditransformasikan melalui penambahbaikan ketersambungan dan mobiliti serta pewujudan persekitaran perniagaan yang kondusif. Semua isi rumah akan menikmati peningkatan dalam tahap pendapatan dan isi rumah B40 akan tergolong dalam kumpulan masyarakat kelas menengah. Kedudukan masyarakat Bumiputera juga akan dipertingkatkan.



**Meningkatkan
kesejahteraan
rakyat**

Kerajaan sentiasa melaksanakan pendekatan pembangunan yang seimbang dengan memberikan penekanan kepada pertumbuhan ekonomi dan kesejahteraan rakyat. Kesejahteraan merujuk kepada taraf dan kualiti hidup yang memenuhi keperluan sosioekonomi, fizikal dan psikologi individu. Kesejahteraan adalah penting bagi meningkatkan produktiviti dan mobiliti sosial serta mengukuhkan kesepaduan sosial dan perpaduan nasional.

Kerajaan akan meningkatkan kesejahteraan rakyat Malaysia tanpa mengira latar belakang sosioekonomi atau lokasi. Setiap rakyat Malaysia akan mempunyai akses kepada penjagaan kesihatan dan rumah mampu milik yang berkualiti. Kawasan kejiranan dan tempat awam yang lebih selamat akan membolehkan rakyat menikmati ketenangan fikiran dan komuniti untuk terus maju dan makmur. Gaya hidup sihat melalui aktiviti sukan dan fizikal akan menjadi amalan hidup sebahagian besar rakyat Malaysia. Lebih penting lagi, integrasi sosial akan menjadi lebih kukuh dan dapat mewujudkan masyarakat Malaysia yang lebih sepakat dan bersatu padu.



**Meningkatkan
pembangunan
modal insan
untuk negara
maju**

Pembangunan modal insan merupakan pemboleh penting bagi memacu pertumbuhan ekonomi dan menyokong peralihan semua sektor kepada aktiviti berintensif pengetahuan. Pasaran buruh yang cekap dan berkesan perlu untuk menarik pelaburan bagi membolehkan rakyat mengambil bahagian dalam aktiviti ekonomi dan mendapat manfaat daripada pertumbuhan ekonomi.

Kerajaan akan meningkatkan produktiviti buruh dan mewujudkan lebih banyak peluang pekerjaan yang memerlukan pekerja berkemahiran tinggi. TVET akan beralih kepada pelaksanaan program latihan yang diterajui industri untuk menyediakan modal insan berkemahiran yang memenuhi keperluan industri. Tenaga kerja sedia ada akan berpeluang untuk terus mempertingkatkan kemahiran dan memajukan diri supaya kekal relevan dalam ekonomi yang dinamik. Paling penting, kualiti pendidikan akan ditingkatkan untuk membangunkan bakat dengan pengetahuan dan kemahiran serta etika dan moral untuk terus maju dalam persekitaran global yang kompetitif dan dinamik.



Menuju ke arah pertumbuhan hijau bagi meningkatkan kemampuan dan daya tahan

Pertumbuhan hijau adalah pertumbuhan yang menggunakan sumber secara cekap, bersih dan berdaya tahan. Kerajaan terus komited untuk meneruskan pembangunan yang lebih mampan dengan beralih daripada trajektori pembangunan konvensional “*grow first, clean-up later*” yang berkos tinggi kepada pertumbuhan hijau bermula pada peringkat perancangan dan seterusnya peringkat pelaksanaan dan penilaian. Komitmen yang padu terhadap pertumbuhan hijau akan memastikan alam sekitar dan sumber asli negara yang bernilai kekal dipelihara dan dilindungi untuk generasi masa kini dan masa hadapan.

Strategi pertumbuhan hijau akan meningkatkan kualiti pertumbuhan, mengukuhkan jaminan bekalan makanan, air dan tenaga serta mengurangkan risiko alam sekitar dan kemusnahan ekologi. Strategi ini dapat meningkatkan kualiti hidup dan kesejahteraan rakyat. Ia juga dapat mengurangkan pelepasan gas rumah kaca dengan signifikan dan pemuliharaan ekosistem kawasan terestrial dan air daratan serta pesisir pantai dan marin yang lebih baik. Amalan penggunaan dan pengeluaran mampan dapat meningkatkan penggunaan tenaga secara cekap dan rendah karbon dalam bangunan, pengangkutan, produk dan perkhidmatan. Selain itu, adaptasi terhadap perubahan iklim, pengurusan risiko bencana serta perlindungan dan pemuliharaan biodiversiti akan diperkukuh untuk melindungi rakyat dan hasil pembangunan.



Memperkukuh infrastruktur bagi menyokong pertumbuhan ekonomi

Pembangunan infrastruktur adalah penting bagi memastikan rakyat mempunyai akses kepada kemudahan asas dan perkhidmatan seperti pengangkutan, komunikasi, elektrik dan air bersih. Integrasi pelbagai mod pengangkutan yang lebih baik akan memudahkan pergerakan orang dan barangan dengan lebih lancar. Di samping itu, infrastruktur yang cekap dapat mengurangkan kos mengendalikan perniagaan, dan seterusnya meningkatkan produktiviti dan daya saing negara. Oleh itu, infrastruktur yang baik menjadi asas kepada penyertaan sosial serta perkembangan dan pertumbuhan ekonomi.

Pelaburan baharu dalam pembinaan jalan raya, rel dan perkhidmatan udara akan diimbangi oleh usaha untuk menambah baik tahap produktiviti, kecekapan dan perkhidmatan bagi infrastruktur berkenaan. Capaian digital akan ditambah baik melalui peluasan infrastruktur jalur lebar dan inisiatif bagi memastikan perkhidmatan jalur lebar yang mampu dibayar. Kecekapan sektor logistik dan fasilitasi perdagangan akan dipertingkatkan bagi membolehkan Malaysia menjadi pintu masuk logistik pilihan ke Asia. Peluasan dan pelaburan baharu dalam rangkaian dan kapasiti rawatan air serta pembedung akan diteruskan. Penekanan juga akan diberikan untuk meningkatkan jaminan dan keandalan sektor tenaga dengan mengambil langkah yang bersesuaian bagi menangani isu berkaitan pembekalan dan permintaan.



Merekayasa pertumbuhan ekonomi untuk peningkatan kemakmuran

Pertumbuhan ekonomi yang kukuh adalah penting bagi mencapai aspirasi negara maju. Ekonomi yang kukuh dan mempunyai sumber pertumbuhan yang pelbagai serta mengeluarkan barangan dan perkhidmatan bernilai tinggi akan menjana pekerjaan bergaji tinggi selaras dengan ciri-ciri sebuah negara maju. Asas ekonomi perlu terus diperkukuh bagi membolehkan Malaysia berdaya tahan terhadap kejutan luar tanpa menjejaskan kemakmuran rakyat.

Semua sektor ekonomi akan beralih kepada aktiviti nilai ditambah tinggi dan berintensif pengetahuan. Sektor perkhidmatan akan beralih kepada perkhidmatan moden seperti kewangan Islam, industri halal, industri kreatif, ekopelancongan, teknologi maklumat dan komunikasi, dan minyak dan gas. Sektor pembuatan akan beralih kepada pengeluaran produk yang bernilai tinggi, lebih kompleks dan pelbagai dalam tiga subsektor pemangkin, iaitu kimia; elektrik dan elektronik; dan mesin dan peralatan. Sektor pertanian akan dimodenkan melalui penggalakkan amalan pertanian mampan dan penggunaan teknologi moden untuk menjana pendapatan lebih tinggi. Pertumbuhan dalam semua sektor ekonomi ini akan disokong oleh peningkatan inovasi dan produktiviti, modal insan berkemahiran dan pengantarabangsaan.

Pemacu Perubahan

Meningkatkan potensi produktiviti

Mengapa produktiviti penting kepada Malaysia?

Pada masa lalu, pertumbuhan ekonomi negara sebahagian besarnya didorong oleh input, terutamanya melalui pelaburan swasta dalam industri dan pelaburan awam dalam infrastruktur, utiliti serta sekolah dan hospital. Sungguhpun pelbagai usaha untuk meningkatkan produktiviti telah dilaksanakan, Malaysia masih ketinggalan berbanding dengan kebanyakan negara berpendapatan tinggi. Sebagai contoh, tahap produktiviti buruh di Malaysia ialah sebanyak 32% daripada tahap di Amerika Syarikat dan 56% daripada tahap di Korea Selatan pada tahun 2013. Walaupun negara akan terus meningkatkan pelaburan swasta dan mengekalkan pelaburan awam dalam tempoh RMKe-11, penekanan yang lebih tinggi akan diberikan untuk memantapkan produktiviti bagi mencapai pertumbuhan ekonomi yang lebih tinggi, mampan dan inklusif.

Apakah kejayaan yang boleh dicapai?

Dalam tempoh RMKe-11, produktiviti buruh disasarkan meningkat daripada RM77,100 pada tahun 2015 kepada RM92,300 pada tahun

2020. Di samping itu, pertumbuhan setiap sektor akan meningkat berikutan penambahbaikan dalam produktiviti.

Bagaimana kejayaan ini boleh dicapai?

Pendekatan untuk meningkatkan produktiviti negara akan beralih daripada inisiatif yang diterajui oleh Kerajaan pada peringkat nasional kepada tindakan bersasar merentasi sektor awam, peserta industri dan setiap perusahaan. Pendekatan ini akan diterajui oleh juara yang dikenal pasti yang menjadi contoh perubahan dan memastikan penerimaan oleh pihak berkepentingan. Inisiatif menyeluruh yang mempunyai sasaran untuk dipantau akan dibangunkan dan disesuaikan mengikut sektor. Pada peringkat nasional, insentif berasaskan produktiviti akan diperkenalkan dan pengukuhan kawal selia akan dipercepat. Pada peringkat industri, jaguh industri akan menerajui inisiatif mengikut industri manakala pada peringkat perusahaan, insentif dan program untuk meningkatkan kemahiran akan disediakan. Secara keseluruhan, strategi tersebut akan menghasilkan perubahan ketara seperti dijelaskan di bawah.

	Daripada	Kepada
Pendekatan	Inisiatif produktiviti tidak bersepadu, biasanya hanya pada peringkat nasional	Strategi berfokus dan menyeluruh pada semua peringkat, iaitu peringkat nasional, industri dan perusahaan
Peneraju	Diterajui oleh Kerajaan	Diterajui oleh jaguh industri dan persatuan industri dan disokong oleh Kerajaan melalui Majlis Produktiviti Nasional
Tumpuan Industri	Fokus kepada sektor pembuatan dan beberapa subsektor perkhidmatan terpilih	Merangkumi semua sektor termasuk pertanian, pembinaan dan sektor awam
Reka bentuk program	Program bersifat generik tanpa sasaran yang jelas ----- Insentif tidak dikaitkan dengan prestasi	Program yang sejajar dengan keperluan industri berdasarkan pelan induk industri berkaitan ----- Memperkenalkan insentif yang dikaitkan dengan outcome
Peraturan	Kekurangan atau tiada hubungan antara dasar atau peraturan dengan produktiviti	Mewujudkan hubungan antara dasar atau peraturan Kerajaan dengan produktiviti
Pemantauan	Pemantauan pada peringkat nasional sahaja	Meningkatkan pemantauan merentasi peringkat nasional, industri dan perusahaan

Pemacu Perubahan

Meningkatkan taraf isi rumah B40 ke arah masyarakat kelas menengah

Mengapa peningkatan taraf isi rumah B40 penting kepada Malaysia?

Pada masa ini, terdapat kira-kira 2.7 juta isi rumah B40 dengan pendapatan bulanan purata sebanyak RM2,537. Dalam keadaan Malaysia terus membangun dan makmur, isi rumah B40 tidak wajar dipinggirkan daripada menikmati peluang yang terhasil daripada kemakmuran negara. Sekiranya isi rumah B40 terus berada dalam kedudukan sosioekonomi semasa mereka, ini akan mengakibatkan kos sosial kepada negara melalui pengurangan bilangan tenaga kerja berkemahiran yang diperlukan dan memberikan kesan kepada pertumbuhan output negara. Manakala ketidakseimbangan bandar yang berterusan menyebabkan potensi pertumbuhan ekonomi di luar bandar dan pinggir bandar terjejas.

Apakah kejayaan yang boleh dicapai?

Semua isi rumah B40 tanpa mengira etnik akan diberikan lebih tumpuan, terutamanya kepada isi rumah miskin dan berpendapatan rendah di bandar dan luar bandar serta isi rumah mudah terjejas¹ dan aspirasi². Saiz dan komposisi isi rumah kelas menengah akan

meningkat kepada 45% menjelang tahun 2020. Purata pendapatan isi rumah B40 akan meningkat daripada RM2,537 pada tahun 2014 kepada RM5,270 pada tahun 2020. Bilangan isi rumah B40 yang berpendidikan tertiar akan meningkat daripada 9% pada tahun 2014 kepada 20% pada tahun 2020. Agihan pendapatan isi rumah B40 kepada pendapatan isi rumah nasional juga akan meningkat daripada 16.5% pada tahun 2014 kepada 20% pada tahun 2020.

Bagaimana kejayaan ini boleh dicapai?

Kerajaan akan melaksanakan strategi bagi meningkatkan pendapatan dan pemilikan kekayaan isi rumah B40, menangani isu peningkatan kos sara hidup dan memperkukuh mekanisme penyampaian bagi menyokong isi rumah B40. Indeks Kemiskinan Pelbagai Dimensi (MPI) akan diperkenalkan untuk memastikan elemen mudah terjejas dan kualiti hidup diambil kira sebagai pengukuran tambahan kepada pendapatan. Peralihan utama yang akan berlaku adalah seperti yang berikut:

	Daripada	Kepada
Pendekatan	Meningkatkan isi rumah B40 melangkaui paras garis kemiskinan dengan menambah baik tahap pendapatan dan bantuan kos sara hidup	Meningkatkan isi rumah B40 kepada masyarakat kelas menengah melalui tahap pendapatan dan penciptaan kekayaan serta peningkatan tahap pendidikan dan kemahiran
Skop	Membantu isi rumah B40 yang terlibat dalam perusahaan mikro persendirian ----- Tumpuan kepada pembangunan keusahawanan dan aktiviti ekonomi dalam industri tradisional bernilai rendah	Mengukuhkan perusahaan berasaskan komuniti dan sosial di samping perusahaan persendirian ----- Membangunkan kapasiti untuk terlibat dalam aktiviti ekonomi yang berproduktiviti tinggi, inovatif dan kreatif
Ciri-ciri	Isi rumah B40 mempunyai kekayaan dan pemilikan aset bukan kewangan yang rendah dan mudah terjejas kepada kejutan ekonomi ----- Isi rumah B40 amat bergantung kepada bantuan Kerajaan	Isi rumah B40 mampu untuk menyimpan dan menjana kekayaan melalui pemilikan aset bukan kewangan supaya lebih berdaya tahan untuk menghadapi kejutan ekonomi ----- Isi rumah B40 boleh berdikari dan kurang kebergantungan kepada bantuan Kerajaan

¹ Isi rumah mudah terjejas merujuk kepada isi rumah berpendapatan antara paras garis kemiskinan (PGK) dan 2.5 kali PGK.

² Isi rumah aspirasi merujuk kepada isi rumah berpendapatan antara 2.5 kali PGK dan pendapatan purata nasional.

Pemacu Perubahan

Mengupayakan pendidikan dan latihan teknikal dan vokasional (TVET) yang diterajui industri

Mengapa TVET penting kepada Malaysia?

Di bawah RMKe-11, sebanyak 60% daripada 1.5 juta pekerjaan yang akan diwujudkan dijangka memerlukan kelayakan berkaitan TVET. Bagi memenuhi keperluan ini, Malaysia perlu meningkatkan pengambilan pelajar setiap tahun secara berperingkat daripada 164,000 pada tahun 2013 kepada 225,000 pada tahun 2020. Cabaran bukan hanya untuk mencapai sasaran pengambilan sahaja. Maklum balas daripada pihak industri mendapati wujud jurang antara pengetahuan, kemahiran dan sikap graduan berbanding dengan keperluan di tempat kerja.

Apakah kejayaan yang boleh dicapai?

Sektor TVET yang cekap dan berkesan adalah :

- Pemandaran penawaran dengan permintaan, dan mekanisme pengawalan kualiti yang dinamik bagi memastikan institusi TVET awam dan swasta memenuhi standard kualiti;
- Industri dan penyedia TVET bekerjasama antara satu sama lain sepanjang rantai nilai daripada pengambilan pelajar, reka bentuk kurikulum, penyampaian dan penempatan pekerjaan; dan
- Pelajar dimaklumkan dengan jelas peluang yang ditawarkan TVET, dan menjadikan TVET sebagai aliran pendidikan yang menarik. Pelajar mempunyai akses kepada pelbagai program inovatif yang diterajui oleh industri yang menawarkan latihan amali sama ada di tempat kerja atau simulasi persekitaran pekerjaan yang dapat memberikan pendedahan kepada pelajar mengenai dunia pekerjaan yang sebenar.

Bagaimana kejayaan ini boleh dicapai?

Dalam mencapai aspirasi ini, sistem TVET perlu diharmonikan dan diperkemas untuk mengurangkan ketidakseragaman merentasi institusi TVET awam dan swasta. Di samping itu, program dan intervensi untuk menggalakkan TVET yang diterajui oleh industri akan dilaksanakan bagi memastikan graduan TVET adalah selaras dengan keperluan industri. Ringkasan peralihan utama yang akan dilaksanakan adalah seperti yang berikut:

	Daripada	Kepada
Tadbir Urus	<p>Dua badan akreditasi, Agensi Kelayakan Malaysia (MQA) dan Jabatan Pembangunan Kemahiran (JPK) yang mempunyai set kelayakan yang berbeza</p> <p>Sistem penarafan yang berbeza bagi institusi TVET awam dan swasta di bawah Kementerian yang berbeza</p>	<p>Sistem kelayakan tunggal diguna pakai oleh MQA dan JPK</p> <p>Sistem penarafan tunggal bagi institusi TVET awam dan swasta</p>
Penyampaian Program	<p>Pembangunan dan penyampaian kurikulum diterajui institusi TVET masing-masing atau Kerajaan</p> <p>Tiada pengkhususan antara institusi TVET</p>	<p>Pembangunan dan penyampaian TVET diterajui oleh industri dengan kerjasama institusi TVET dengan Kerajaan</p> <p>Pengkhususan institusi melalui penubuhan Pusat Kecemerlangan dalam bidang tujuhan dan kepakaran</p>
Kapasiti	164,000 pengambilan pada tahun 2013	225,000 pengambilan pada tahun 2020, dengan mengoptimalkan penggunaan institusi sedia ada
Profil	Pengiktirafan yang terhad dan faedah yang rendah	Kerjaya pilihan untuk pelajar

Pemacu Perubahan Melaksanakan pertumbuhan hijau

Mengapa pertumbuhan hijau penting kepada Malaysia?

Malaysia, seperti kebanyakan negara di seluruh dunia, sedang bergelut dengan cabaran untuk mengimbangi antara pertumbuhan penduduk dan peningkatan permintaan dengan persekitaran semula jadi yang semakin tertekan. Dalam konteks intensiti dan kekerapan cuaca melampau yang semakin meningkat, peralihan kepada pertumbuhan hijau kini menjadi keperluan kepada Malaysia. Usaha ini melambangkan komitmen Malaysia untuk memperkukuh lagi kemampunan alam sekitar.

Apakah kejayaan yang boleh dicapai?

Outcome trajektori pertumbuhan hijau adalah:

- Impak negatif aktiviti sosioekonomi ke atas sistem alam sekitar dikurangkan;
- Sumber semula jadi termasuk kawasan hutan, biodiversiti dan sumber air serta ekosistem dinilai dan diurus secara mampan;

- Hasil pembangunan dilindungi, seterusnya tahap kesejahteraan rakyat yang lebih baik untuk setiap generasi; dan
- Penggunaan tenaga adalah cekap dan tenaga boleh baharu digunakan secara meluas.

Bagaimana kejayaan ini boleh dicapai?

Pencapaian ke arah aspirasi pertumbuhan hijau memerlukan peralihan daripada trajektori pembangunan konvensional “*grow first, clean-up later*” kepada trajektori pembangunan yang berdaya tahan, rendah karbon dan penggunaan sumber yang cekap sebagai pelaburan jangka masa panjang yang akan memberi manfaat kepada generasi masa hadapan. Strategi baharu ini memerlukan perubahan fundamental merentasi setiap dimensi utama meliputi aspek penetapan dasar, pengawalseliaan institusi, perkongsian tanggungjawab dan kesedaran terhadap alam sekitar.



Pemacu Perubahan

Menjana kekayaan melalui inovasi

Mengapa inovasi penting kepada Malaysia?

Inovasi adalah pemacu utama bagi pertumbuhan ekonomi kerana penambahbaikan atau pembaharuan proses, teknologi dan model perniagaan akan meningkatkan produktiviti. Di samping itu, inovasi boleh mencipta sumber pendapatan tambahan melalui penghasilan produk dan perkhidmatan terbeza bagi memenuhi keperluan pelanggan yang tidak tertunai sebelum ini. Selaras dengan peralihan sektor ekonomi terutamanya sektor perkhidmatan dan pembuatan kepada aktiviti bernilai tinggi dan berasaskan pengetahuan, inovasi adalah penting bagi meningkatkan kecekapan dan output secara keseluruhan setiap sektor.

Apakah kejayaan yang boleh dicapai?

Ekosistem inovasi yang mantap akan mewujudkan kerjasama dan integrasi yang lebih kukuh antara industri, akademik dan masyarakat. Penyelidikan yang dilaksanakan adalah selaras dengan permintaan industri. Di samping itu, sektor swasta menjadi rakan kongsi yang aktif dengan menyediakan dana, kepakaran dan sumber lain dalam penyelidikan, pembangunan, pengkomersialan dan inovasi (R&D&C&I). Masyarakat juga akan terlibat secara aktif

menangani isu sosial dalam penyediaan perkhidmatan sosial melalui pendekatan keseluruhan masyarakat. Seterusnya, ini akan menghasilkan pulangan yang lebih tinggi kepada pelaburan.

Bagaimana kejayaan ini boleh dicapai?

RMKe-11 akan memberi fokus kepada pengukuhan modal hubungan dengan meningkatkan kerjasama dalam kalangan semua pihak berkepentingan. Inovasi akan disasarkan pada peringkat perusahaan dan masyarakat berbanding usaha sebelum ini yang lebih memberi tumpuan kepada inisiatif pada peringkat nasional. Pada peringkat perusahaan, inisiatif seperti meningkatkan penyelidikan berasaskan permintaan pasaran, meningkatkan kerjasama antara penyelidik dengan industri dan menggalakkan pelaburan swasta dalam R&D&C&I akan dilaksanakan. Pada peringkat masyarakat pula, masyarakat akan digalakkan untuk memberi input kepada mekanisme penyampaian perkhidmatan, sementara model pembiayaan sosial akan dibangunkan bagi membantu masyarakat untuk membiayai inisiatif yang dikenal pasti. Secara kolektif, strategi ini akan menghasilkan satu perubahan besar seperti yang dinyatakan dalam paparan berikut:

Daripada

Kepada

Inovasi perusahaan

Kerjasama antara pihak industri dengan institusi penyelidikan yang terhad menyebabkan hasil R&D tidak selaras dengan permintaan industri

Pelaburan dalam R&D yang menghasilkan pulangan yang rendah atau tidak memacu produktiviti dan daya saing industri

Inovasi sosial

Pelaburan dalam perkhidmatan sosial yang tinggi tetapi penyampaian kurang berkesan

Masyarakat masih bergantung kepada Kerajaan

Perkongsiannya yang lebih baik antara industri dan penyelidik dengan industri membantu untuk merangka penyelidikan yang bersesuaian dengan perniagaan, di samping menyumbang idea, infrastruktur, peralatan dan kepakaran

Inisiatif R&D&C&I yang bersepadu akan menjana pulangan pelaburan yang tinggi dalam jangka masa panjang dan merangsang peningkatan produktiviti

Fokus dalam penyelarasan sistem penyampaian perkhidmatan sosial dengan menggabungkan maklum balas daripada masyarakat sejajar dengan “pendekatan keseluruhan masyarakat”

Penyampaian yang disokong oleh model pembiayaan sosial dan pembiayaan berasaskan outcome bagi menyediakan peluang kepada masyarakat untuk melabur dalam inisiatif berinovatif.

Pemacu Perubahan

Melabur dalam bandar berdaya saing

Mengapa bandar berdaya saing penting kepada Malaysia?

Bandar memainkan peranan penting dalam pertumbuhan negara dengan menyediakan peluang pelaburan dan perdagangan serta meningkatkan ketersambungan dengan kawasan pinggir bandar atau luar bandar. Persaingan global bagi pelaburan dan bakat pada masa kini adalah antara bandar-bandar utama. Keadaan ini memerlukan tumpuan diberikan kepada pelaburan dalam bandar bagi menarik dan mengekalkan bakat serta pelaburan dalam bandar-bandar tersebut. Bandar terbesar di Malaysia iaitu Kuala Lumpur dijangka menyumbang 14.8% kepada KDNK pada tahun 2015. Selaras dengan matlamat Malaysia untuk merekayasa dan merangsang pertumbuhan ekonomi, pembangunan dan pembaharuan bandar adalah sangat penting untuk mewujudkan nadi aglomerasi ekonomi yang kukuh.

Apakah kejayaan yang boleh dicapai?

Pada tahun 2020, empat bandar utama³ di Malaysia dijangka mengalami perubahan dari sudut pertumbuhan ekonomi, kepentingan sebagai hab bakat dan peningkatan daya huni. Penduduk bandar akan mampu memiliki rumah, menikmati sistem pengangkutan awam yang berkualiti, kawasan hijau dan lapang yang mencukupi, serta memiliki akses peluang ekonomi yang membolehkan penduduk bandar menyediakan masa hadapan yang lebih baik kepada anak-anak mereka. Bandar-bandar ini dipilih berdasarkan asas kukuh yang dimiliki dan diharap akan menjadi bandar contoh bagi bandar lain di Malaysia dan serantau. Transformasi bandar-bandar ini akan diperluas ke bandar-bandar lain pada masa hadapan.

Bagaimana kejayaan ini boleh dicapai?

Sebagai permulaan, Pelan Induk Daya Saing Bandar akan dirangka bagi empat bandar utama berdasarkan prinsip meningkatkan daya huni dan menggalakkan pertumbuhan ekonomi. Prinsip ini termasuk mewujudkan kepadatan bagi meningkatkan kecekapan, memperluas pembangunan berorientasikan transit bagi meningkatkan mobiliti dan memperkukuh kluster berasaskan pengetahuan bagi meningkatkan inovasi dan aglomerasi. Pelan induk ini akan mengambil kira kelebihan bandar-bandar tersebut dan dirangka oleh pihak berkuasa tempatan yang berkaitan dengan rundingan bersama sektor swasta dan masyarakat sivil. Pemacu perubahan ini akan menghasilkan transformasi seperti berikut.

	Daripada	Kepada
Kepadatan Ekonomi	Kepadatan ekonomi di bandar tidak dirancang dan berkembang secara organik mengakibatkan produktiviti yang rendah	Peningkatan kepadatan ekonomi bagi meningkatkan produktiviti
Bentuk bandar	Rebakan bandar tidak terkawal dan tertumpu pada kenderaan	Pembangunan berorientasikan transit bagi meningkatkan penggunaan pengangkutan awam dan mengurangkan ketergantungan kepada kenderaan persendirian
Penggunaan sumber	Ketidakcekapan mengakibatkan penggunaan sumber semula jadi yang tinggi	Pengurusan sisa yang cekap menerusi garis panduan penggunaan sumber dan penguatkuasaan yang berkesan
Perumahan	Pembangunan baharu adalah mahal dan eksklusif dengan pilihan mengikut kemampuan yang terhad	Rumah berkualiti dan mampu dimiliki oleh kumpulan sasar dalam masyarakat
Berfokuskan industri	Industri berintensif ruang dan buruh	Pertumbuhan industri berintensif pengetahuan dengan penggunaan ruang yang cekap
Pihak berkuasa tempatan	Pihak berkuasa tempatan yang memberikan tumpuan kepada pelesenan, penguatkuasaan dan penyediaan perkhidmatan asas	Pihak berkuasa tempatan sebagai pemacu strategik bagi pembangunan sosioekonomi setempat

³ Empat bandar utama tersebut ialah Kuala Lumpur, Johor Bahru, Kuching dan Kota Kinabalu

Mentransformasi perkhidmatan awam untuk produktiviti

Bagi menyokong pelaksanaan enam teras strategik dan enam pemacu perubahan, Kerajaan akan mentransformasi perkhidmatan awam supaya lebih berpaksikan rakyat serta meningkatkan produktiviti, kecekapan dan keberkesanan penyampaian perkhidmatan. Transformasi ini bertujuan mengurangkan kerenah birokrasi, hierarki dan membuat keputusan pada peringkat pusat dalam penyampaian perkhidmatan awam; meningkatkan bakat yang mempunyai pelbagai kemahiran; dan menyediakan pelbagai perkhidmatan yang lebih inovatif dan mudah diakses. Bagi mencapai outcome ini, Kerajaan telah mengenal pasti lima bidang fokus seperti yang berikut:

- **Mempertingkatkan penyampaian perkhidmatan bertumpukan rakyat** dengan menghapuskan kerenah birokrasi, memperluas liputan perkhidmatan dan meningkatkan akauntabiliti;
- **Merasionalisasikan institusi sektor awam untuk meningkatkan produktiviti dan prestasi** dengan mengurangkan fungsi dan peranan yang bertindih dalam kalangan agensi, menilai semula saiz perkhidmatan awam, dan memperkenalkan dasar pemisah bagi personel berprestasi rendah;
- **Memperkuh pengurusan bakat untuk perkhidmatan awam masa hadapan** dengan menyediakan persekitaran kerja yang lebih kondusif termasuk waktu kerja yang fleksibel, memperkasa kementerian dan agensi, dan menambah baik latihan sektor awam;
- **Mempertingkatkan pengurusan projek untuk menghasilkan outcome yang lebih baik dan cepat** dengan menambah baik proses pemilihan projek dan pengagihan sumber, menubuhkan pasukan pelaksanaan projek yang khusus, dan mewujudkan kumpulan personel profesional dalam bidang pengurusan projek; dan
- **Memanfaatkan pihak berkuasa tempatan bagi menyediakan perkhidmatan berkualiti pada peringkat tempatan** dengan memperluas penglibatan komuniti setempat dan badan bukan Kerajaan (NGO), meningkatkan liputan dan kualiti perkhidmatan, dan memperkasa kapasiti dan keupayaan pihak berkuasa tempatan.

Malaysia pasca 2020

Tempoh RMKe-11 bukan hanya merupakan kemuncak 30 tahun perjalanan menuju ke arah Wawasan 2020, tetapi juga menjadi platform untuk memacu pertumbuhan negara seterusnya. Cabaran seterusnya, pasca 2020 adalah untuk menjadi sebuah negara yang benar-benar maju dalam tiga dimensi, iaitu ekonomi, rakyat dan alam sekitar.

Wawasan negara adalah supaya semua rakyat Malaysia mempunyai identiti nasional yang mantap serta memiliki moral yang tinggi. Malaysia akan ditadbir oleh institusi eksekutif, perundangan dan kehakiman yang berkecuali dan boleh dipercayai serta melindungi semua rakyat secara saksama. Malaysia akan mempunyai sebuah Kerajaan yang dapat menyampaikan perkhidmatan berkesan dan dipimpin oleh pemimpin yang berintegriti, berpendirian teguh dan amanah. Malaysia akan cemerlang di arena antarabangsa sebagai sebuah negara merdeka yang teguh dan juga melalui personaliti yang menonjol dalam pelbagai bidang.

Ekonomi negara adalah progresif, inklusif dan kalis cabaran pada masa hadapan dan mempunyai bandar bertaraf dunia yang produktif di samping kawasan luar bandar yang berkembang maju. Rakyat Malaysia dapat turut serta dalam arus pembangunan dan mendapat manfaat sepenuhnya daripada kemajuan ekonomi serta menikmati tahap kesejahteraan yang tinggi. Rakyat akan menjivai dan menghargai alam sekitar dan tidak lagi menjadikan alam sekitar sebagai galang ganti kepada pencapaian ekonomi yang kukuh. Ini menjadikan Malaysia sebagai negara yang benar-benar indah dan kondusif untuk didiami.

Aspirasi yang digambarkan ini walaupun tidak komprehensif dan tidak memberikan gambaran yang menyeluruh, namun, ia dapat dijadikan asas bagi menggerakkan perbincangan dan penglibatan lanjut pelbagai pihak mengenai hala tuju pembangunan negara pada pasca 2020. Pada asasnya, rakyat Malaysia menginginkan negara terus maju dan inklusif dengan rakyat menghargai perpaduan serta meraikan kepelbagaian.

Kesimpulan

RMKe-11 adalah sangat penting memandangkan rancangan ini merupakan rancangan lima tahun terakhir sebelum Malaysia mencapai status negara maju dan inklusif selaras dengan Wawasan 2020. Pelan ini dirangka dengan rakyat sebagai fokus utama bagi semua usaha pembangunan, iaitu untuk meningkatkan taraf hidup dan martabat, serta potensi rakyat untuk menyertai aktiviti ekonomi dan menikmati kekayaan negara. Enam teras strategik dan enam pemacu perubahan telah dikenal pasti bagi memecah amalan kelaziman (*business as usual*) yang membelenggu kelancaran pembangunan dan seterusnya mengubah trajektori pertumbuhan ekonomi.

RMKe-11 akan membolehkan Malaysia melangkah maju ke hadapan. Pelan strategi ini memberi penekanan kepada dasar ekonomi makro yang mantap, aspek inklusiviti supaya tiada rakyat Malaysia yang terpinggir, kesejahteraan rakyat yang lebih baik, modal insan yang berkemahiran tinggi, pertumbuhan mampan dan hijau, infrastruktur yang dapat menyokong pertumbuhan ekonomi, serta perkhidmatan awam yang berpaksikan rakyat dan berproduktiviti tinggi. Penekanan ini akan memastikan semua rakyat, tanpa mengira gender, etnik, status sosioekonomi dan lokasi dapat hidup dalam masyarakat yang benar-benar harmoni dan progresif selaras dengan ciri-ciri negara maju dan inklusif.